

四庫全書

集部

欽定四庫全書

集部
唐百家詩選卷二

詳校官中書臣張經田

助教臣常循覆勘

總校官原任中允臣王燕緒

校對官中書臣石鴻裔

謄錄監生臣喬元賦

欽定四庫全書

集部八

唐百家詩選

總集類

提要

臣等謹案唐百家詩選二十卷舊本題宋王安石編其去取絕不可解自宋以來疑之者不一曲為解者亦不一然大抵指為安石惟晁公武讀書志云唐百家詩選二十卷皇朝宋敏求次道編次道為三司判官嘗取其家

所藏唐人一百八家詩選擇其佳者凡一千二百四十六首為一編王介甫觀之因再有所去取且題云欲觀唐詩者觀此足矣世遂以為介甫所纂其說與諸家特異按讀書志作於南宋之初去安石未遠又晁氏自元祐以來舊家文獻緒論相承其言當必有自邵博聞見後錄引晁說之之言謂王荊公與宋次道同為羣牧司判官次道家多唐人詩集

荆公盡即其本擇善者籤帖其上令吏抄之
吏厭書字多輒移所取長詩籤置所不取小
詩上荆公性忽畧不復更視今世所謂唐百
家詩選曰荆公定者乃羣牧司吏人定也其
說與公武又異然說之果有是說不應公武
反不知考周煇清波雜志亦有是說與博所
記相合煇之曾祖與安石為中表故煇持論
多左袒安石當由安石之黨以此書不愜於

公論造為是說以解之託其言於說之博不考而載之耳此本為宋乾道中倪仲傳所刊前有仲傳序其書世久不傳

國朝康熙中商邱宋榮始購殘本八卷刻之既又得其全本續刻以行而二十卷之數復完當時有疑其偽者閻若璩歷引高棅唐詩品彙所稱以明皇早度蒲關詩為開卷第一陳振孫書錄解題所稱非惟不及李杜韓三家

即王維韋應物元白劉柳孟郊張籍皆不及
以證其真又殘本佚去安石原序若璩以臨
川集所載補之其文具載若璩潛邱劄記中
惟今本所錄共一千二百六十二首較晁氏
所記多十六首若璩未及置論或傳寫讀書
志者誤以六十二為四十六歟至王昌齡出
塞詩諸本皆作若使龍城飛將在此本作盧
城飛將若璩引唐平州治盧龍縣以證之然

詩人誤用往往而然不必曲為之諱唐三百年更無一人稱盧龍為盧城者何獨昌齡杜撰地名此其過尊宋本之失有不可為典要者矣乾隆四十三年三月恭校上

總纂官臣紀昀臣陸錫熊臣孫士毅

總校官臣陸費墀

唐百家詩選原序

音有妙而難賞曲有高而寡和古今通然無惑乎唐百家詩選之淪沒於世也予自弱冠肄業於香溪先生門嘗得是詩於先生家藏之秘竊愛其拔唐詩之尤清古典麗正而不冶凡以詩鳴於唐有驚人語者悉羅於選中於是心惟口誦幾欲裂去夏課而學焉先生知之一日索而鑰諸笥越至於今不復過目者有年矣頃有親戚游官南昌因得之於臨川以歸首以出示發卷數過

不啻如獲遺珠之喜惜其道遠難致且字畫漫滅近世
士大夫嗜此詩者往往不能無恨故鏤板以新其傳庶
幾丞相荆國公銓擇之意有所授於後人也雅德君子
儻於三冬餘暇玩索唐世作者用心則發而為篇章殆
見游刃餘地運斤成風矣乾道己丑四月望日倪仲傳
序

唐百家詩選原序

余與宋次道同為三司判官時次道出其家藏唐詩百
餘編誨余擇其精者次道因名曰百家詩選廢日力於
此良可悔也雖然欲知唐詩者觀此足矣

[illegible]

欽定四庫全書

唐百家詩選卷一

宋 王安石 編

明皇二首

早渡蒲關

鐘鼓嚴更曙山河野望通
鳴鑿下蒲坂飛旆入秦中
地險關逾壯天平鎮尚雄
春來津樹合月落戍樓空
馬色分朝景雞聲逐曉風
所希常道泰非復俟繻同

經魯祭孔子而歎之

夫子何為者栖栖一代中地猶鄒氏邑宅即魯王宮歎
鳳嗟身否傷麟怨道窮今看兩楹奠當與夢時同

德宗一首

送徐州張建封還鎮

牧守寄所重才賢生為時宣風自淮甸授鉞膺藩維入
覲展遐應臨軒慰來思忠誠在方寸感激陳情詞報國
爾所向恤人予是資歡宴不盡懷車馬當還期穀雨將

應候行春猶未遲勿以千里遙而云無已知

薛稷一首

秋日還京陝西十里作

驅車越陝郊北顧臨大河隔河見鄉邑秋風水增波西
登咸陽途日暮憂思多傳巖既紆鬱首山亦嵯峨操築
無昔老採薇有遺歌客遊節回換人生知幾何

劉希夷九首

希夷字庭芝
武后時人

故園置酒

酒熟人須飲春還鬢已秋願逢千日醉得緩百年憂舊
里多青草新知盡白頭風前燈易滅川上月難留卒卒
周姬旦棲棲魯孔丘平生能幾日不及且遨遊

晚憇南陽旅館

旅館何年廢征夫此日過途窮人自哭春至鳥還歌行
路新知少荒田古路多池篁覆丹谷墳樹遶清波日照
蓬陰轉風微野氣和傷心不可去回首怨如何

採桑

楊柳送行人青青西入秦誰家採桑女樓上不勝春盈
盈灞水曲步步春芳綠紅臉曜明珠絳唇含白玉回首
渭橋東遙憐樹色同釵梳映落日綰綺弄春風攜籠長
歎息逶迤戀春色看花若有情倚樹疑無力薄暮思悠
悠使君南陌頭相逢不相識歸去夢青樓

代閨人春日

珠簾的曉光玉顏豔春彩林間鳥鳴喚戶外花相待花
鳥惜芳菲鳥鳴花亂飛人今伴花鳥日暮不能歸池月

憐歌扇山雲愛舞衣佳期楊柳陌攜手莫相違

秋日題汝陽潭壁

獨坐秋陰至悲來從所適行見汝陽潭飛蘿蒙水石懸
瓢木葉上風吹何歷歷幽人不耐煩振衣步閑寂回流
清見底金沙覆銀礫錯落非一丈空隴幾千尺魚鱗可
憐紫鴨毛自然碧吟詠秋水篇渺焉忘損益秋水隨形
影清濁混心跡歲暮歸去來東山余宿昔

代悲白頭翁

洛陽城東桃李花飛來飛去落誰家洛陽女兒惜顏色
行逢落花長歎息今年花落顏色改明年花開復誰在
已見松柏摧為薪更聞桑田變成海古人無復洛城東
今人還對落花風年年歲歲花相似歲歲年年人不同
寄言全盛紅顏子須憐半死白頭翁此翁白頭真可憐
伊昔紅顏美少年公子王孫芳樹下清歌妙舞落花前
光祿池臺開錦繡將軍樓閣畫神仙一朝卧病無人識
三春行樂在誰邊宛轉蛾眉能幾時須臾鶴髮亂如絲

但看舊來歌舞地唯有黃昏鳥雀悲

巫山懷古

巫山幽陰地神女豔陽年襄王伺容色落日望悠然歸
來高堂夜金缸燄青煙頽想卧瑤席夢魂何翩翩搖落
殊未已榮華倏徂遷愁思瀟湘浦悲涼雲夢田猿啼秋
風夜雁飛明月天巴歌不可聽聽此益潺湲

春女行

春女顏如玉怨歌陽春曲巫山春樹紅沅湘春草綠自

憐妖豔姿粧成獨見時
愁心伴楊柳春盡亂如絲
目極千餘里悠悠春江水
顏想玉關人愁臥金閨裏
尚言春花落不知秋風起
嬌愛猶未終悲涼從此始
憶昔楚王宮玉樓妝粉紅
纖腰弄明月長袖舞春風
容華委西山光陰不可還
桑林沒東海富貴今何在
寄言桃李容胡為閨閣重
但看楚王墓唯見數株松

孤松篇

蠶月桑葉青鶯時柳花白
澹豔烟雨滋敷芬陽春陌
如

何秋風起零落從此始獨有南澗松不歎東流水玄陰
天地冥皓雪朝夜零豈不罹寒暑為君留青青青好
顏色落落任孤直羣樹遙相望衆草不敢逼靈龜卜真
隱仙鳥宜棲息恥受秦帝封願言唐侯食寒山夜月明
山冷氣清清淒兮歸風集吹之作琴聲松子卧仙岑寂
聽凝野心清冷有真曲樵採無知音美人何時來幽逕
委綠苔吁嗟深澗底棄捐廣厦材

王適一首

詠江濱梅

忽見寒梅樹開花漢水濱不知春色早疑是弄珠人

韋述一首

晚渡伊水

悠悠涉伊水伊水清見石是時春向深兩岸草如積迢
遞望洲嶼逶迤亘津陌新樹落疎紅遙原上深碧回瞻
洛陽苑遽有長山隔煙霧猶辨家風塵已為客登陟多
異趨往來見行役雲起早已昏鳥飛日將夕光陰逝不

借起然慕疇昔遠遊亦何為歸來存竹帛

盧象十首

開元天寶時人

雜詩二首

家居五原上征戰是平生獨負山西勇誰當塞上名死
生遼海戰雨雪薊門行諸將封侯盡論功獨不成

君家御溝上垂柳夾朱門列鼎會中貴鳴珂朝至尊死
生在片議窮達由一言須識苦寒士莫矜狐白溫

八月十五日象自江東止田園移莊慶會未幾

歸汶上小弟幼妹尤悲其別兼賦是詩

謝病始告歸依然入桑梓家人皆佇立相候衡門裏疇
類皆長年成人舊童子上堂家慶畢願與親姻通論舊
或餘悲思存且相喜田園轉蕪沒但有寒泉水衰柳日
蕭條秋光清邑里入門乍如客休騎非便止中飲顧王
程離憂從此始兩妹日成長雙鬟將及人已能持寶瑟
自解掩羅巾念昔別時小未知疎與親今來識離恨掩
淚方殷勤小弟更孩幼歸來不相識同居雖漸慣見人

猶默默宛作越人言殊鄉甘水食別此最為難淚盡有
餘憶

寄江上段十六

與君相識即相親聞道君家住孟津為見行舟試借問
客中時有洛陽人

贈劉藍田

籬中犬迎吠出屋候柴扉歲晏輸井稅山村人暮歸晚
田始家食餘布成我衣對此能無事勞君問是非

白髮

我年一何長鬢髮日已白
俛仰天地間能為幾時客
惆悵故山雲徘徊空日夕
何事與時人東城復南陌

鄉賦後自輦還田家因謝鄰友見過之作

雞鳴出東邑馬倦登南巒
落日見桑柘翳然丘中寒
鄰家多舊識投暝來相看
且問春稅苦兼陳行路難
園塲近陰壑草木皆凋殘
峰暗雪猶積澗深冰已團
浮名知何用歲晏不成歡
置酒共君飲當歌聊自寬

竹里館

江南冰不閉山澤氣潛通臘月聞山鳥寒崖見蟄熊柳
林青半合荻荀亂無叢回首金陵岸依依向北風

和徐侍郎叢篠詠

中禁夕沈沈幽篁別作林色連雞樹近影落鳳池深為
重凌霜節能虛應物心年年承雨露長對紫庭陰

宴別趙都護

結客候旌麾元戎復在斯門開都護府兵動羽林兒黠

虜多翻覆謀臣有別離
智同天所授恩共日相隨
漢使開賓幕胡笳送酒卮
風霜迎馬首雨雪事魚麗
上策應無戰深情屬載馳
不應行萬里明主寄安危

孟浩然三十三首

字浩然襄陽人開元天寶間以詩聞於時不仕卒年五十二

湘中旅泊寄閻九司戶防

桂水通百越扁舟期曉發
荆雲蔽三巴夕望不見家
襄王夢行雨才子謫長沙
長沙饒瘴癘胡為苦留滯
久別思欸顏承歡懷接袂
接袂杳無由徒增旅泊愁
清猿不

可聽沿月下湘流

歲暮歸南山

北闕休上書南山歸敝廬
不才明主棄多病故人疎
白髮催年老青陽逼歲除
永懷愁不寐松月夜窻虛

陪張丞相自松滋江入舟東泊渚宮作

放溜下松滋登舟命檝師
詎忘經濟日不憚沍寒時
洗幘豈獨古濯纓良在茲
政成人自理機息鳥無疑
雲氣霾孤嶼江天辨四維
晚來風稍急冬至日行遲
獵響驚

雲夢漁歌激楚詞渚宮何處是川暝欲安之

歲暮海上作

仲尼既已歿予亦浮於海昏見斗柄回始知歲星改虛
舟任所適垂釣非有待借問乘槎人滄洲復誰在

自洛之越

皇皇三十載書劒兩無成山水尋吳越風塵厭洛京扁
舟泛湖海長揖謝公卿且樂杯中酒誰論世上名

王山人迴見尋

歸閑日無事雲卧晝不起有客款柴扉自云巢居子問
君何所之採藥來城市家在鹿門山常遊澗湖水手持
白羽扇脚蹋青芒履聞道鶴書徵臨流還洗耳

遊精思觀迴王山人在後

出谷未停午至家已夕曛回瞻下山路但見牛羊羣樵
子暗相失草蟲寒不聞衡門猶未掩佇立待夫君

夜泊宣城界

西塞沿江島南陵問驛樓湖平津濟濶風止客帆收去

去懷前浦茫茫汎夕流石逢羅剎礙山泊敬亭幽火熾
梅根治烟迷楊葉洲離家復水宿相伴賴沙鷗

永嘉上浦館逢張八子容

逆旅相逢處江村日暮時衆山遙對酒孤嶼共題詩
宇鄰鮫室人煙接島夷鄉關萬餘里失路一相悲

宿業師山房期丁鳳進士不至

夕陽度西嶺羣壑倏已暝松月生夜涼風泉滿清聽樵
人歸欲盡烟鳥棲初定之子期宿來攜琴候蘿徑

夕次蔡陽館

日暮馬行疾荒城人住稀
聽歌知近楚投館忽如歸
魯堰田疇廣章陵氣色微
明朝拜家慶須著老萊衣

過故人莊

故人具雞黍邀我至田家
綠樹村邊合青山郭外斜
開筵面場圃把酒話桑麻
待到重陽日還來就菊花

登鹿門山懷古

清曉因興來乘流越江峴
沙禽近初識浦樹遙莫辨
漸

到鹿門山山明翠微淺
崑潭多屈曲舟楫屢回轉
昔聞龐德公采藥遂不返
金澗養芝朮石床卧苔蘚
紛吾感耆舊結攬事攀踐
隱迹今尚存高風邈已遠
白雲何時去丹桂空偃蹇
探討竟未窮回艫夕陽晚

裴司功負司士見尋

府僚能枉駕家醞復新開
落日池上酌清風松下來
厨人具雞黍稚子摘楊梅
誰道山公醉猶能騎馬回

送杜晃進士之東吳

荆吳相接水為鄉君去春江正淼茫日暮征帆泊何處
天涯一望斷人腸

登江中孤嶼貽王山人迴

悠悠清江水水落沙嶼出回潭石下深綠篠岸傍密蛟
人潛不見漁父歌自逸憶與君別時泛舟如昨日夕陽
開返照中坐興非一南望鹿門山歸來恨相失

晚泊潯陽望廬峰作

挂席幾千里名山都未逢泊舟潯陽郭始見香爐峰嘗

讀遠公傳永懷塵外蹤東林精舍在日暮但聞鐘

同張明府清鏡歎

妾有盤龍鏡清光常晝發自從生塵埃有若霧中月愁
來試取照坐歎生白髮寄語邊塞人如何久離別

宿終南翠微寺空上人房

翠微終南裏雨後宜返照閉關久沉冥杖策一遊眺遂
造幽人室始知靜者妙儒道雖異門雲林頗同調兩心
喜相得畢景共談笑暝還高窻眠時見遠山燒緬懷赤

城標更憶臨海嶠風泉有清音何必蘇門嘯

送友人之京

君登青雲去予望青山歸雲山從此別淚濕薜蘿衣

京還留別新豐諸官

吾道慚所適驅車還向東主人開舊館留客醉新豐樹
繞溫泉綠塵昏晚日紅拂衣從此去高步躡華嵩

江上別流人

以我越鄉客逢君謫居者分飛黃鶴樓流落蒼梧野驛

騎尋雲去孤帆沿溜下不知從此分還袂何時把

上巳日洛中寄王山人迴

卜洛成周地浮盃上巳筵鬪雞寒食下走馬射堂前垂
柳金堤合平沙翠幕連不知王逸少何處會羣賢

秋登萬山寄張五儋

北山白雲裏隱者自怡悅相望試登高心隨鳥飛滅愁
因薄暮起興是清秋發時見歸村人沙平渡頭歇天邊
樹若薺江畔洲如月何當載酒來共醉重陽節

夜歸鹿門寺歌

山寺鳴鐘晝已昏
漁梁渡頭爭渡喧
人隨沙路向江村
予亦乘舟歸鹿門
鹿門月照開烟樹
忽到龐公棲隱處
品靡松徑長寂寥
唯有幽人夜來去

與諸子登峴山作

人事有代謝往來成古今
江山留勝跡我輩復登臨
水落漁梁淺天寒夢澤深
羊公碑尚在讀罷淚沾襟

赴京途中遇雪

迢遞秦京道蒼茫歲暮天窮陰連晦朔積雪滿山川落
雁迷沙渚飢鳥噪野田客愁空佇立不見有人烟

宿建德江

移舟泊滄渚日暮客愁新野曠天低樹江清月近人

萬山潭作

垂釣坐磐石水清心自閑魚游潭樹下猿挂島藤間神
女昔解珮傳聞於此山求之不可得沿月櫂歌還

春中喜王九相尋

二月湖水清家家春鳥鳴
林花掃更落徑草蹋還生
酒伴來相命開尊共解酲
當盃已入手歌妓莫停聲

途中遇晴

已失巴陵雨猶逢蜀坂泥
天開斜景遍山出晚雲低
餘濕仍霑草殘流尚入溪
今宵有明月鄉思遠悽悽

送從弟邕落第東遊會稽

疾風吹征帆倏爾向空沒
千里去俄頃三江坐起忽
向來共歡娛日夕成楚越
落羽更分飛誰能不驚骨

和張丞相春朝對雪

迎氣當春立承恩喜雪來潤從河漢下花逼豔陽開不
覩豐年瑞安知燮理才撒鹽如可擬願糝和羹梅

欽定四庫全書

唐百家詩選
卷一

十六

唐百家詩選卷一

欽定四庫全書

唐百家詩選卷二

宋 王安石 編

高適上六十首

淇上酬薛三據兼寄郭主簿

自從別京華我心乃蕭索十年守章句萬事空寥落北
上登薊門茫茫見沙漠倚劒對風塵慨然思衛霍拂衣
去燕趙驅馬悵不樂天長滄州路日暮邯鄲郭酒肆或

淹留魚潭屢棲泊獨行備艱險所見窮善惡永願拯菑
莢孰辭干鼎鑊皇情念淳古時俗何浮薄理道資任賢
安人在求瘼故交負靈竒逸氣包蹇諤隱軫經濟具縱
橫建安作才望忽先鳴風期無宿諾飄飄勞州縣迢遞
限言謔東馳渺貝丘西顧彌號略淇水徒自流浮雲不
堪託吾謀適可用天路豈寥廓不然買山田一身與耕
鑿且欲同鷦鷯焉能志鴻鵠

途中酬李少府贈別之作

西上逢節換東征私自憐故人今卧疾欲別還留連舉
酒臨南軒夕陽滿中庭寧知江上興乃在河梁偏行李
多光輝札翰忽相鮮誰謂歲月晚交情尚貞堅終嗟州
縣勞官謗復述遠雖負忠信美其如方寸懸連帥扇清
風千里猶眼前曾是趨藻鏡不應翻棄捐日來知自強
風氣殊未痊可以加藥物胡為輒憂煎驅馬出大梁原
野一悠然柳色感行客雲陰愁遠天皇明燭幽遐德澤
普昭宣鵲鴻列霄漢鶯雀何翩翩余亦愜所從漁樵十

二年種瓜漆園裏鑿井盧門邊去去勿重陳生涯難勉
旃或期遇春事與爾復周旋投報空回首狂歌謝比肩

東平路中遇水

天災自古有昏墊彌今秋霖霖溢川源頌洞涵田疇指
途適汶陽挂席經蘆洲永望齊魯郊白雲何悠悠旁沿
鉅野澤大水縱橫流蟲蛇擁獨樹麋鹿奔行舟稼穡隨
波瀾西成不可求室居相枕藉蛙黷聲啾啾仍憐穴蟻
漂益羨雲禽遊農人無倚著野老生殷憂聖主多深仁

廟堂運良籌倉廩終爾給田租應罷收我心何鬱陶征
旅亦悲愁縱橫濟時策誰肯論吾謀

留別洛下諸公兼贈鄭三韋九

憶昨相逢論久要顧君哂我輕常調羈旅雖同白社遊
詩書比作青雲料蹇步蹉跎竟不成年過四十尚躬耕
長歌達者杯中物冷笑前人身後名幸逢明盛多招隱
高山大澤徵求盡此時也得辭漁樵青袍裹身荷聖朝
牛犁釣竿不復見縣人邑吏來相邀遠路鳴蟬秋興發

華堂美酒離憂消不知何時更攜手應念茲辰去折腰

封丘作

我本漁樵孟諸野一生自是悠悠者乍可狂歌草澤中
寧堪作吏風塵下祇言小邑無所為公門百事皆有期
拜迎官長心欲破鞭撻黎庶令人悲悲來向家問妻子
舉家盡笑今如此生事應須南畝田世情付與東流水
夢想舊山安在哉為銜君命日遲迴乃知梅福徒為爾
轉憶陶潛歸去來

贈別韋叅軍

二十辭書劔西遊長安城舉頭望君門屈指取公卿國
風冲融邁三五朝廷歡樂彌寰宇白璧皆言賜近臣布
衣不得干明主歸來洛陽無負郭東過梁宋非吾土兔
苑為農歲不登雁池垂釣心長苦世人向我同衆人唯
君於我翻相親且喜百年有交態未曾一日辭家貧彈
棋擊筑白日晚縱酒高歌楊柳春歡娛未盡分散去使
我惆悵驚心神終當不作兒女別臨岐涕泗沾衣巾

九月九日酬顏少府

簷前白日應可惜
離下黃花為誰有
行子迎霜未授衣
主人得錢始沽酒
蘇秦顛顛時多厭
蔡澤栖遑世看醜
縱使登高祇斷腸
不如獨坐空搔首

送李少府貶峽中王少府貶長沙

嗟君此別意何如
駐馬銜杯問謫居
巫峽啼猿數行淚
衡陽歸雁幾封書
青楓江上秋天遠
白帝城邊古木疎
聖代即今多雨露
暫時分手莫躊躇

平臺夜遇李景參有別

離憂忽浩然策馬對秋天
孟諸薄暮涼風起歸客相逢
渡睢水昨時攜手已十年
明日分途各千里歲物蕭條
滿路岐此行浩蕩令人悲
家貧羨爾有微祿欲往從之
何所之

別晉處士

有人家住清河源渡河問我遊
梁園手持道經注已畢
心知內篇口不言盧門十年見
秋草此心惆悵誰能道

知己從來不易知
慕君為人與君好
別時九月桑葉疎
出門千里行無車
愛君且欲君先達
今日求賢早上書

送別

昨夜離心正鬱陶
三更白露西風高
螢飛木落何淅瀝
此時夢見西歸客
曉鐘寥亮三四聲
東鄰嘶馬使人驚
攬衣出戶一相送
唯見歸雲縱復橫

燕歌行

并序

開元二十六年有從元戎出塞而還者作燕歌行以示

適感征戍之事因而和焉

漢家烟塵在東北漢將辭家破殘賊男兒本自重橫行
天子非常賜顏色縱金伐鼓下榆關旌旆逶迤碣石間
校尉羽書飛瀚海單于獵火照狼山山川蕭條極邊土
胡騎憑陵雜風雨戰士軍前半死生美人帳下猶歌舞
大漠窮秋草木腓孤城落日鬪兵稀身當恩遇常輕敵
力盡關山未解圍鐵衣遠戍辛勤久玉筋應啼別離後
少婦城南欲斷腸征人塞北空回首邊庭飄颻那可度

絕域蒼茫何所有殺氣三時作陣雲寒聲一夜傳刁斗
相看白刃血紛紛死節從來豈顧勲君不見沙場征戰
苦至今猶憶李將軍

古大梁行

古城蒼茫多荆榛驅馬荒城愁殺人魏王宮館盡禾黍
信陵賓客隨灰塵憶昔雄都舊朝市軒車照耀歌鐘起
軍容帶甲三十萬國步連營一千里金盛須臾那可論
高臺曲池無復存遺墟但有狐狸窟古地空餘草木根

暮天搖落傷懷抱倚劒悲歌對秋草俠客猶傳朱亥名
行人尚識夷門道白壁黃金萬戶侯寶刀駿馬填山丘
年代淒涼不可問往來惟有水東流

行路難

君不見富家翁舊時貧賤誰比數一朝金多結豪貴萬
事勝人健如虎子孫成行滿眼前妻能管絃妾歌舞自
矜一身忽如此却笑旁人獨愁苦東隣少年安所如席
門窮巷出無車有才不肯學干謁何用年年空讀書

邯鄲少年行

邯鄲城南遊俠子自矜生長邯鄲裏
千場縱博家仍富幾處報讐身不死
宅中歌笑日紛紛門外車馬常如雲
未知肝胆向誰是令人却憶平原君
君不見即今交態薄黃金用盡還疎索
以茲感歎辭舊遊更於時事無所求
且與少年飲美酒往來射獵西山頭

薊門行五首

邊城十一月雨雪亂霏霏
元戎號令嚴人馬亦輕肥
羌

胡無盡日征戰幾時歸

幽州多騎射結髮重橫行一朝事將軍出入有聲名紛
紛獵秋草相向角弓鳴

黯黯長城外日沒更烟塵胡騎雖憑陵漢兵不顧身古
樹滿空塞黃雲愁殺人

薊門逢故老獨立思氛氲一身既零丁頭髮白紛紛勲
庸今已矣不識霍將軍

漢家能用武開拓窮異域戍卒厭糟糠降胡重衣食關

亭試一望吾欲淚沾臆

營州歌

營州少年厭原野
皮裘蒙茸獵城下
虜酒千杯不醉人
胡兒十歲能騎馬

魯郡途中

誰謂嵩潁客
遂經鄒魯鄉
前臨少昊墟
始覺東蒙長
獨行豈吾心
懷古激中腸
聖人久已矣
游夏遙相望
徘徊野澤間
左右多悲傷
日出見闕里
川平知汶陽
弱冠負

高節十年思自強終當不得意去去任行藏

酬鴻臚裴主簿雨後北樓見贈之作

暮霞照新晴歸雲猶相逐有懷晨昏暇想見登眺目
禮侍彤襜題詩訪茅屋高樓多古今陳事滿陵谷地
久微子封臺餘孝王築徘徊顧霄漢豁達俯川陸遠
水對秋城長天向喬木公門何清靜列戟森已肅不
歎攜手稀常思著鞭速終當拂羽翰輕舉隨鴻鵠

宋中遇林慮楊十七山人因而有別

昔予涉漳水驅車行鄴西遙見林慮山蒼蒼憂天倪邂逅逢爾曹說君彼嵒棲蘿徑垂野蔓石房倚雲梯秋韭一何青藥苗數百畦栗林隘谷口枯木森迴谿耕耘有山田紡績有山妻人生但如此寧事組與珪誰謂遠相訪曩情常不迷簷前舉醇醪竈下烹隻雞朔風忽振蕩昨夜寒螿啼遊子益思歸罷琴傷解攜出門盡原野白日黯已低始驚道路難終恨言笑睽因聲謝岑壑歲暮一攀躋

送馮判官

碣石遼西地漁陽薊北天關山唯一道雨雪盡三邊才
子方為客將軍正愛賢遙知幕府下書記日翩翩

酬龐十兵曹

憶昔遊京華自言生羽翼懷書訪知己末路空相識許
國不成名還家有慙色託身從畎畝浪迹初自得雨澤
感天時耕耘忘帝力同人洛陽至問我睢水北遂爾歎
津涯淨然見胷臆高談懸物象逸韻投翰墨別岸迴無

垠海鶴鳴不息梁城多古意攜手共悽惻懷賢想鄒枚
登高思荊棘世情惡疵賤之子憐孤直酬贈感并深離
憂豈終極

漣上酬王秀才

飄飄經遠道客思滿窮秋浩蕩對長漣君行殊未休
崎嶇山海側想像無前儔誰謂照垂珠忽然欲暗投東路
方蕭條楚歌復悲愁暮帆使人感去鳥兼離憂行矣當
自愛壯心莫悠悠予亦從此辭異鄉難久留贈言豈終

極慎勿滯滄洲

東平留贈狄司馬

曾與田安
西充判官

古人無宿諾茲道未為難
萬里赴知己一言誠可歎
馬蹄經月窟劒術指樓蘭
地出北庭盡城臨西海寒
森然瞻武庫則是弄儒翰
入幕綰銀綬乘軺兼鐵冠
練兵日精銳殺敵無遺殘
獻捷見天子論功俘可汗
激昂丹墀下顧盼青雲端
誰謂縱橫策翻為權勢干
將軍既坎壈使者亦辛酸
耿介挹三事羈離從一官
知君不得意他

日會鵬搏

餞宋八充彭中丞判官之嶺外

覩君濟時畧使我氣填膺長策竟不用高才徒見稱一朝知己達累日詔書徵羽翮忽然動風飈誰敢陵舉鞭趨嶺嶂屈指冒炎蒸北雁送馳驛南人思飲冰彼邦本倔强習俗多驕矜翠羽干平法黃金撓直繩若將除害馬慎勿信蒼蠅魑魅寧無患忠貞適有憑猿啼山不斷鳶跼路難登海岸出交趾江城連始興繡衣當節制幕府

盛威稜勿憚九疑險須令百越澄立談多感激行李即
嚴凝離別胡為者雲霄遲爾昇

同羣公題鄭少府田家

此公昔任白馬尉今寄住滑臺

鄭侯應栖遑五十頭盡白昔為南昌尉今作東郡客與
語多遠心論交知損益秋林既清曠窮巷空淅瀝蝶舞
園更閒雞鳴日云夕男兒未稱意其道固無適勸君且
杜門勿嫌人事隔

同顏六少府旅居秋中之作

欽定四庫全書

唐百家詩選
卷二

十三

傳君昨夜悵然悲，獨坐深齋落木時。
逸氣舊來凌燕雀，高才何得混妍蚩。
迹勞黃綬人多歎，心在青雲世莫知。
不是鬼神無正直，從來州縣有瑕疵。

酬裴秀才

男兒貴得意，何必相知早。
飄蕩與物華，蹉跎覺身老。
長卿無產業，季子慙妻嫂。
此事難重陳，未於衆人道。

宋中送族姪式顏時張大夫貶括州使人召式
顏遂有此作

大夫擊東胡胡塵不敢起胡人山下哭胡馬海邊死部
曲盡封侯興臺亦朱紫當時有勲績末路遭讒毀轉旆
燕趙間剖符括蒼裏弟兄莫相見親族遠分梓不改青
雲心仍招布衣士平生懷感激本欲候知己去矣難重
陳飄飄自茲始遊梁且未愜適越今何以鄉山西北愁
竹箭東南美崢嶸縉雲外蒼茫萬餘里猿鳥亂啾啾朝
昏孰云已登臨多瘴癘動息在風水雖有賢主人終為
客行子我攜一尊酒滿酌聊勸爾與爾唯一言家聲勿

淪淖

淇上送韋司倉往滑臺

飲酒莫辭醉，醉多適不愁。
孰知非遠別，終念對新秋。
滑臺門外見淇水，眼前流君去。
應回首風波滿渡頭。

別魏八

更沽淇上酒，還汎驛前舟。
為惜故人去，復憐嘶馬愁。
雲山行處合，風雨興中秋。
此路無知己，明珠莫暗投。

宋中三首

逍遙漆園吏冥沒不知年
世事浮雲外閑居大道邊
古來同一馬今我亦忘筌

登高臨舊國懷策對窮秋
落日鴻雁度寒城砧杵愁
昔賢不復有行矣莫淹留

閔伯去已遠高丘臨道傍
人皆有兄弟獨爾為參商
終古猶如此而今安可量

自淇涉黃河

朝從北岸來泊船南河澍
試共野人言深覺農夫苦
去

秋雖薄熟今夏猶未雨耕耘日勗勞租稅兼烏鹵園蔬
空寥落薄產不足數尚有獻芹心無因見明主

和崔二少府登楚邱城作

故人亦不遇異縣久棲託辛勤失路意感歎登樓作清
晨眺原野獨立窮寥廓雲散芒碭山水還睢陽郭遶梁
即襟帶封衛多漂泊事古悲城池年豐愛墟落相逢俱
未展攜手空蕭索何意千里心仍求百金諾公侯皆我
輩動用在謀畧聖心思賢才竭來刈葵藿

同朱五題盧使君義井

高義惟良牧深仁自下車寧知鑿井處還是飲冰餘地
即泉源久人當汲引初體清能鑒物色淡每含虛上善
滋來往中和泱里閭濟時應未竭懷惠復何如

哭單父梁九少府

開篋淚沾臆見君前日書夜臺今寂寞猶是子雲居疇
昔探靈竒登臨賦山水同舟南楚下望月西江裏契闊
多別離綢繆到生死九原即何處萬事皆如昨晉山徒

嵯峨斯人已寂寞常時祿且薄沒後家復貧妻子在遠
道弟兄無一人十上多苦心一官恒自哂青雲將可致
白日忽先盡唯有身後名空留無遠近

送柴司戶充劉卿判官之嶺外

嶺外資雄鎮朝端寵節旄月卿臨幕府星使出詞曹海
對羊城闊山連象郡高風霜驅瘴癘忠信涉波濤別恨
隨流水交情脫寶刀有才無不適行矣莫徒勞

雜言賦得還山吟送沈山人

還山吟天高日暮寒山深送君還山識君心人生老大
須恣意看君解作一生事山間偃仰無不至石泉淙淙
若風雨松花桂子常滿地賣藥囊中應有錢還山服藥
又長年白雲勸盡杯中物明月相隨何處眠眠時憶問
醒時事夢魂可以長周旋

酬岑二十秋夜見贈之什

舍下蛩亂鳴居然自蕭索緬懷高秋興忽枉清夜作感
物我心勞涼風驚二毛池空菡萏死月出梧桐高如何

異鄉縣復得交才彥汨沒嗟後時蹉跎恥相見箕山別
來後魏闕誰不戀獨有江海心悠然未嘗倦

苦雪

二月猶北風天陰雪冥冥寥落一室中悵然慙百齡苦
愁正如此門柳復青青

李雲南征蠻

并序

天寶十一載有詔伐西南夷丞相楊公兼節制之寄乃
奏前雲南太守李宓涉海自交趾擊之道路艱難往復

數萬里蓋百王之所未通也十二載四月至於長安君
子是以知廟堂使能而李公効節余忝斯人之舊因賦
是詩

聖人赫斯怒詔伐西南戎肅穆廟堂上深沉節制雄遂
令感激士得建非常功料死不料敵顧恩寧顧終鼓行
天海外轉戰蠻夷中梯巘近高鳥穿林經毒蟲鬼門無
歸客北戶多南風蜂蠆隔萬里風雲隨九攻長驅大浪
破急擊羣山空餉道忽已遠縣軍垂欲窮精誠動白日

憤薄連蒼穹野處掘田鼠脯餐蕪熨僮收兵列亭堠拓
地彌西東臨事恥苟免履危能飭躬將星獨照耀邊色
何溟濛瀘水夜可涉交州今始通歸來長安道名見甘
泉宮廡蘭若未死孫吳知暗同相逢論意氣慷慨謝深
衷

登百丈峰

朝登百丈峰遙望燕支道漢壘青冥冥胡天白如掃憶
昔霍將軍連年此征討匈奴終不滅寒山徒草草惟見

鴻雁飛令人傷懷抱

送渾將軍出塞

將軍族貴兵且強漢家已是渾邪王子孫相承在朝野
至今部曲燕支下控弦盡用陰山兒臨陣常騎大宛馬
銀鞭玉勒繡螭弧每逐嫖姚破骨都李廣從來先將士
衛青未肯學孫吳傳有沙場千萬騎昨日邊庭羽書至
城頭畫角三四聲匣裏寶刀晝夜鳴意氣能甘萬里去辛
勤動作一年行黃雲白草無前後朝建旌旗夕刁斗塞

下應多俠少年關西不見春楊柳從軍借問所從誰擊
劍酣歌當此時遠別無輕繞朝策平戎早寄仲宣詞

寄宿田家

田家老翁住東陂說道平生隱在茲鬢白未曾記日月
山青每到識春時門前種柳深成巷野谷流泉添入池
牛壯日耕十畝地人閑常掃一茅茨客來滿酌清罇酒
感興平吟才子詩嵩際窟中藏鼯鼠潭邊竹裏隱鷓鴣
林稀落日行人少醉後無心怯路岐今夜只應還寄宿

明朝拂曉與君辭

酬司空燧少府

飄飄未得意感激與誰論
昨日偶夫子乃欣吾道存
江山滿詞賦札翰起涼溫
吾見風雅作人知德業尊
驚飈蕩萬木秋氣屯高原
燕趙何蒼茫鴻雁來翩翩
此時與君別握手欲無言

同衛八題陸少府書齋

知君薄州縣好靜無冬春
散帙至棲鳥明燈留故人
深

房臘酒熟高院梅花新若是周旋地當令風義親

同羣公題張處士菜園

耕地桑柘間地肥菜常熟為問葵藿資何如廟堂肉

同羣公出獵海上

畋獵自古昔況伊心賞俱偶與羣公遊曠然出平蕪曾
陰漲溟海殺氣窮幽都鷹隼何翩翩馳驟相傳呼豺狼
竄榛莽麋鹿罹艱虞高鳥下駢弓困獸鬪匹夫塵驚大
澤晦火燎深林枯失之有餘恨獲者無全軀咄彼工拙

間恨非指蹤徒猶懷老氏訓感歎此歡娛

魯西至東平四首

南圖適不就東走豈吾心索索涼風動行行秋水深蟬
鳴木葉落茲夕更愁霖

昨時好書策動欲干王公今日無成事依依親老農扁
舟向何處吾愛汶陽中

清曠涼夜月飄飄孤客舟渺然風波上獨夢前山秋
到復搖落空令行者愁

沙岸泊不定石橋水橫流
問津見魯俗懷古傷家丘
寥落千歲後空傳褒聖侯

別韋五

徒然酌杯酒不覺散人愁
相識仍遠別欲歸翻旅遊
夏雲滿郊甸明月照河洲
莫恨征途遠東看漳水流

唐百家詩選卷二

欽定四庫全書

集部

唐百家詩選卷三

詳校官中書臣張經田

助教臣常循覆勘

總校官原任中允臣王燕緒

校對官中書臣石鴻翥

謄錄監生臣喬元賦

欽定四庫全書

唐百家詩選卷三

宋 王安石 編

高適下十二首

自淇涉黃河四首

川上恒極目世情今似閒
去帆帶落日征路隨長山
親友若雲霄可望不可攀
於茲任所愜浩蕩風波間

亂流自茲始倚楫時一望遙
見楚漢城崔嵬高山上天

道昔未測人心無所向屠釣稱王侯龍蛇爭霸王緬懷
多殺戮顧此增慘愴聖代休甲兵吾其得閒放

野人盡白頭與我忽相訪手持青竹竿日暮淇水上雖
老美容色雖貧若閒放約莫三十年中心無所向

朝景入平川川長復垂柳遙看魏公墓突兀前山後憶
昔大業中羣雄各奔走伊人何電邁獨立風塵首傳檄
舉教倉擁兵屯洛口連營一百萬六合如可有方項終
比肩亂隋將假手力爭固難恃驕戰曷能久若使學蕭

曹功名當不朽

宋中四首

梁王昔金盛賓客復多才悠悠一千年陳迹唯高臺寂
寞向秋草悲風千里來

出門望終古獨立悲且歌憶昔魯仲尼栖栖此經過衆
人不可向伐樹將如何

朝臨孟諸上忽見芒碭間赤帝終已矣白雲長不還時
清更何有禾黍遍空山

梁苑白日暮梁山秋草時君王不可見脩竹令人悲九月桑葉盡寒風吹樹枝

宓公琴臺詩

并序

甲子歲適登子賤琴臺賦三首首章懷宓公之德千祀不朽次章美太守李公能嗣子賤之政再造琴堂末章美邑宰崔公能繼子賤之理

宓子昔為政鳴琴登此臺琴和人亦間千祀稱其才臨眺忽悽愴人琴安在哉悠悠此天壤空有頌聲來

邦伯感遺事慨然建琴堂乃知靜者心千載猶相望入
室想其人出門何茫茫唯見白雲合東臨鄒魯鄉
皤皤邑中老自言邑中理何必升君堂然後知君美開
門無犬吠早臥常宴起昔人不忍欺今我還復爾

贈別沈四山人

沈侯未可測其況信浮沉十載常獨坐幾人知此心乘
舟蹈滄海買劍投黃金世務不足煩有田西山岑我來
遇知己遂得開神襟何意閩閩間沛然江海深疾風捲

秋樹濮上多鳴砧耿耿尊酒前聯雁飛愁陰平生重離
別感激對孤琴

岑參上五十首

文本之曾孫天寶初登進士第
由庫部郎中出嘉州刺史卒

巴南舟中夜書事

渡口欲黃昏歸人爭渡喧近鐘清野寺遠火點江村見
雁思鄉信聞猿積淚痕孤舟萬里夜秋月不堪論

青山峽口泊舟懷狄侍御

峽口秋水壯沙邊且停橈奔濤振石壁峰勢如動搖九

月蘆花新彌令客心焦誰念在江島故人滿天朝無處
豁心胷憂來醉能銷往來巴山道三見秋草凋狄生新
相知才調陵雲霄賦詩圻造化入幕生風颭把筆判甲
兵戰士不敢驕皆云梁公後遇鼎還能調一別候經時
音塵殊寂寥何當見夫子不歎鄉關遙

送王大昌齡赴江寧

對酒寂不語悵然愁送君明時未得用白首徒工文澤
國從一官滄波幾千里羣公滿天闕獨去過淮水舊家富

春渚常憶卧江樓自聞君欲行頻夢南徐州窮巷獨閉
門寒燈靜深屋北風吹微雪抱被肯同宿君行到京口
正是桃花時舟中饒孤興湖上多新詩潛虬且深蟠黃
鵠舉未晚惜君青雲器努力加餐飯

臨河縣客舍呈狄明府兄留題縣南樓

鳳陽城南雪正飛黎陽渡頭人未歸河邊酒家堪寄宿
主人小女能縫衣故人高臥黎陽縣一別三年不相見
邑中雨雪偏著時隔河東郡人遙羨鄴都唯見古時丘

漳水還如舊日流
城上望鄉應不見
朝來好是嬾登樓

送楊子

斗酒渭城邊
壚頭耐醉眠
梨花千樹雪
楊葉萬條烟
惜別添壺酒
臨岐贈馬鞭
看君潁上去
新月到家圓

送蓋孺卿落第歸濟州

獻賦頭欲白
還家衣已穿
羞過灞陵樹
歸種汶陽田
客舍少鄉信
床頭無酒錢
聖朝徒側席
濟上獨遺賢

宿太白東溪李老舍寄弟姪

渭上秋雨過北風何騷騷天晴諸山出太白峰最高主
人東溪老兩耳生長毫遠近知百歲子孫皆二毛中庭
井欄上一架獼猴桃石泉飯香粳酒甕新開糟愛茲田
中趣始悟世上勞我行有勝事書此寄爾曹

送張郎中赴隴右覲省卿公

時卿公充
節度留後

中郎鳳一毛世上獨英豪弱冠已銀印出身唯寶刀還
家卿月迴度隴將星高幕下多相識邊書醉嬾操

登古鄴城

下馬登鄴城空城復何見東風吹野火日暮飛雲電城隅南對望陵臺漳水東流不復回武帝宮中人去盡年年春色為誰來

送許子擢第歸江寧拜親因寄王大昌齡

建業控京口金陵歛滄溟君家臨秦淮傍對石頭城十年自勤學一鼓遊上京青春登甲科動地聞香名解榻皆五侯結交盡時英六月槐花飛忽思蓴菜羹跨馬出國門丹陽返柴荆楚雲引歸帆淮水浮客程到家拜親時

入門有光榮鄉人盡來賀置酒相邀迎閒眺因登樓醉
眠湖上亭月從海門出照見茅山青昔為帝王州今幸
天地平五朝變人世千載空江聲玄元告靈符丹洞獲
其銘皇帝受玉冊羣臣羅天庭喜氣薄太陽祥光徹宵
冥奔走朝萬國崩騰集百靈王兄尚謫宦屢見秋雲生
孤城帶後湖心與湖水清一縣無諍辭有時開道經黃
鶴垂兩翅徘徊悲且鳴相思不可見空望牛女星

武威送劉單判官赴安西行營便呈高開府

熱海亘鐵門火山赫金方白草磨天涯胡沙莽茫茫夫
子佐戎幕其鋒利如霜中歲學兵符不能守文章功業
須及時立身有行藏男兒感忠義萬里忘越鄉孟夏邊
候遲胡國草未長馬疾過飛鳥天窮超夕陽都護新出
師五月發軍裝甲兵二百萬錯落金光揚揭旗拂崑崙
伐鼓震蒲昌太白引官庫天威臨大荒西望雲似蛇戎
夷知喪亡渾驅大宛馬繫取樓蘭王曾到交河城風土
斷人腸塞驛遠如點邊烽互相望赤亭多飄風鼓怒不

可當有時無人行沙石亂飄颻夜靜天蕭條鬼哭夾道
傍地上多髑髏皆是古戰場置酒高館夕邊城月蒼蒼
軍中宰肥牛堂上羅羽觴紅淚金燭盤嬌歌豔新妝望
君仰青冥短翮難可翔蒼然西郊道握手何慨慷

玉門關蓋將軍歌

蓋將軍真丈夫行年三十執金吾身長七尺頗有鬚玉
門關城迴且孤黃沙萬里百草枯南鄰犬戎北接胡將
軍到來備不虞五千甲士膽力麤軍中無事但歡娛暖

屋繡簾紅地爐織成壁衣花毼毹燈前侍婢瀉玉壺金
鐺亂點野駝酥紫紵金章左右趨問著即是蒼頭奴美
人一雙閒且都朱脣翠眉映明臚清歌一曲世所無今
日喜聞鳳將雛可憐絕勝秦羅敷使君五馬謾踟躕野
草繡窠紫羅襦紅牙鏤馬對桴蒲玉盤纖手掇作盧衆
中誇道不曾輸檣上昂昂皆駿駒桃花叱撥價最殊騎
將獵向城南隅臘日射殺千年狐我來塞外按邊儲為
君取醉酒剝酤醉爭酒盞相喧呼却憶咸陽舊酒徒

天山雪送蕭治歸京

天山有雪常不開，千峰萬嶺雪崔嵬。
北風夜卷赤亭口，一夜天山雪更厚。
能兼漢月照銀山，復逐胡風過鐵關。
交河城邊飛鳥絕，輪臺路上馬蹄滑。
晝澹寒氛萬里凝，闌干陰崖千丈冰。
將軍狐裘卧不暖，都護寶刀凍欲斷。
正是天山雪下時，送君走馬歸京師。
客中何以贈君別，唯有青青松樹枝。

涼州館中與諸判官夜集

彎彎月出挂城頭城頭月出照涼州涼州七城十萬家
胡人半解彈琵琶琵琶一曲腸堪斷風蕭蕭今夜漫漫
河西幕中多故人故人別來三五春花門樓前見秋草
豈能貧賤相看老一年大笑能幾回斗酒相逢須醉倒

初過隴山途中呈宇文判官

一驛過一驛驛騎如星流平明發咸陽暮及隴山頭隴
水不可聽嗚咽令人愁沙塵撲馬汗霧露凝貂裘西來
誰家子自道新封侯前月發安西路上無停留都護猶

未到來時在西州十日過砂磧終朝風不休馬走碎石
中四蹄皆血流萬里奉王事一身無所求也知塞垣苦
豈為妻子謀山口月欲出先照關城樓谿流與松風靜
夜相颼颼別家賴歸夢山塞多離憂與子且攜手不愁
前路脩

燉煌太守後庭歌

燉煌太守才且賢郡中無事高枕眠太守到來山出泉
黃砂磧裏人種田燉煌耆老鬢皓然願留太守更五年

城頭月出星滿天曲房置酒張錦筵美人紅妝色正鮮
側垂高髻插金鈿醉坐藏鉤紅燭前不知鉤在若箇邊
為君手把珊瑚鞭射得半段黃金錢此中樂事亦已偏

送祁樂歸河東

祁樂後來秀挺身出河東往年詣驪山獻賦溫泉宮天
子不召見揮鞭遂從戎前月還長安囊中金已空有時
忽乘興畫出江上峰牀頭蒼梧雲簾下天台松忽如高
堂上颯颯生清風五月火雲屯氣燒天地紅鳥且不敢

飛子行如轉蓬少華與首陽隔河勢爭雄新月河上出
清光滿闌中置酒灞亭別高歌披心胷君到故山時為
謝吾老翁

送郭乂

地上青草出經冬今始歸博陵無近信猶未換春衣憐
汝不忍別送汝上酒樓初行莫早發且宿灞橋頭功名
須及早歲月莫虛擲早年已攻詩近日兼注易何時過
東洛早晚渡盟津朝歌城邊柳驛地邯鄲道上花撲人

去年四月初我正在河朔曾上君家縣北樓樓上分明
見恒嶽中山明府待君來須計行程及早回到家速覓
長安使待汝書封我自開

安西館中思長安

家在日出處朝來喜東風風從帝鄉來異鄉家信通絕
域地欲盡孤城天遂窮彌年但走馬終日隨飄蓬寂寞
不得意辛勤方在公胡塵淨古塞兵氣屯邊空鄉路眇
天外歸期如夢中遙憑長房術為縮天山東

送魏四落第還都

東歸不得意，客舍戴勝鳴。
臘酒飲未盡，春衫縫已成長。
安柳枝春欲來，洛陽梨花在前開。
魏侯池館今尚在，猶有太師歌舞臺。
君家盛德豈徒然，時人注意在吾賢。
莫令別後無佳句，祇向壚頭空醉眠。

喜韓樽相過

三月灞陵春已老，故人相逢耐醉倒。
甕頭春酒黃花脂，祿米祇充酤酒資。
長安城中足年少，獨共韓侯開口笑。

桃花點地紅班班有酒留君且莫還與君兄弟日攜手
世上虛名好是閒

送張子尉南海

不擇南州尉高堂有老親縣樓重屬氣邑里雜鮫人海
暗三山雨江明五嶺春此鄉多寶玉慎莫厭清貧

澧頭送蔣侯

君住澧水北我家澧水西兩鄉見喬木五里聞鳴雞飲
酒溪雨過彈碁山月低徒開蔣生逕爾去誰相攜

漣水東店送唐子歸嵩陽

野店臨官路重城壓御堤山開灞水北雨過杜陵西歸

夢秋能作

音佐

鄉書醉嬾題橋回忽不見征馬尚聞嘶

南樓送衛馮

得歸字

近縣多來客似君誠亦希南樓取涼好便送故人歸鳥
向望中減雨侵晴處飛應須乘月去且為解征衣

送宇文舍人出宰元城

得陽字

雙鳬出未央千里過河陽馬帶新行色衣聞舊御香縣

花迎墨綬關柳拂銅章別後能為政相思淇水長

贈酒泉韓太守

太守有能政遙聞如古人俸錢盡供客家計常清貧酒
泉西望玉關道千山萬磧皆白草辭君走馬歸長安憶
君倏忽令人老

餞李郎尉武康

潘郎腰綬新雪上縣花春山色低官舍湖光映吏人不
須嫌邑小莫即恥家貧更作東征賦知君有老親

過酒泉憶杜陵別業

昨日宿祁連今朝過酒泉
黃沙西際海白草北連天
愁裏難銷日歸期尚隔年
陽關萬里夢知處杜陵田

武威春暮聞宇文判官安西使還已到晉昌

片雨過城頭黃鸝上戍樓
塞花飄客淚邊柳挂鄉愁
白髮悲明鏡青春換敝裘
君從萬里使聞已到瓜州

宿鐵關西館

馬汗蹋成泥朝馳幾萬蹄
雪中行地角火處宿天倪
塞

迴心常怯鄉遙夢亦迷那知故園月也到鐵關西

題苜蓿峰寄家人

苜蓿峰邊逢立春胡蘆河上淚沾巾閨中只是空相憶
不見沙場愁殺人

玉關寄長安李主簿

去去長安萬里餘故人何惜一行書玉關西望腸堪斷
況復明朝是歲除

逢入京使

故園東望路漫漫雙袖龍鍾淚不乾馬上相逢無紙筆
憑君傳語報平安

暮秋山行

疲馬臥長坂夕陽下通津山風吹空林颯颯如有人蒼
旻霽涼雨石路無飛塵千念集暮節萬籟悲蕭辰鷓鴣
昨夜鳴蕙草色已陳況在遠行客自然多苦辛

函谷關歌送劉評事使關西

君不見函谷關崩城毀壁至今在樹根草蔓遮古道空

谷千年長不改寂寞無人空舊山聖朝無外不須關白
馬公孫何處去青牛老人更不還蒼苔白骨空滿地月
與古時長相似野花不省見行人山鳥何曾識關吏故
人方乘使者車吾知郭丹却不如請君時懷關外客行
到關西多寄書

衛尚書赤驃馬歌

君家赤驃畫不得一團旋風桃花色紅纓紫鞵珊瑚鞭
玉鞍錦韉黃金勒請君鞍出看君騎尾長窄地如紅絲

自矜諸馬皆不及却憶百金新買時香街紫陌鳳城內
行人見者誰不愛揚鞭驟急白汗流弄影行驕碧蹄碎
紫髯胡雛金剪刀平明剪出三駿高厓上看時獨意氣
衆中牽出偏雄豪騎將獵向南山口城南狐兔不復有
草頭一點疾如飛却使蒼鷹翻向後憶昨看君朝未央
鳴珂擁蓋滿路香始知邊將真富貴可憐人馬相輝光
男兒稱意得如此駿馬常鳴北風起待君東去掃胡塵
為君一日行千里

郡齋閒望

負郭無良田，屈身徇微祿。平生好疎曠，何事就羈束。幸
曾趨丹墀，數載侍黃屋。故人盡榮寵，誰念此幽獨。州縣
非宿心，雲山忻滿目。頃來廢章句，終日披案牘。佐郡竟
何成，自悲徒碌碌。

潼關使院懷王七秀才

王生今才人，時輩咸所仰。何當見顏色，終日勞夢想。驅
車到關下，欲往阻河廣。滿目徒春華，思君罷心賞。開門

見太華朝日映高掌忽覺蓮花峰別來更如長無心顧
微祿有意佳獨往不負林中期終當出塵網

宿華陰郭東客舍憶閭防

次舍山郭近解鞍鳴鍾時主人炊新粒行子充夜飢關
月生首陽照見華陰祠蒼茫秋山晦蕭瑟寒松悲久從
園廬別遂與朋知辭舊壑蘭杜晚歸軒今已遲

田使君美人舞如蓮花北錠歌

此曲本出
北同城

如蓮花舞北錠世人有眼應未見高堂滿地紅氍毹試

舞一曲天下無此曲胡人傳入漢諸客見之驚且歎慢
臉嬌蛾纖復穠輕羅金縷花蔥籠迴裾轉袖若飛雪左
鉞右鉞生旋風琵琶橫笛和未市花開山頭黃雲合忽
作出塞入塞聲白草明沙寒颯颯翻身入破如有神前
見後見回回新始知諸曲不可比採蓮落梅徒聒耳世
人學舞只是舞姿態豈能得如此

衙郡守還

世事何反覆一身難可料頭白翻折腰還家私自笑

所嗟無產業妻子嫌不調五斗米留人東溪憶垂釣

陪使君早春東郊游眺

得春字

太守擁朱輪東郊物候新鶯聲隨坐嘯柳色喚行春
谷口雲迎馬溪邊水照人郡中叨佐理何幸接芳塵

題號州西樓

錯料一生事蹉跎今白頭縱橫皆失計妻子也堪羞
明主雖能棄丹心亦未休愁來無去處只上郡西樓

號州後亭送李判官使赴晉絳

得秋字

西原驛路挂城頭客散江亭雨未休
君去試看汾水上白雲猶似漢時秋

和賈舍人早朝大明宮

雞鳴紫陌曙光寒鶯囀皇州春色闌
金闕曉鐘開萬戶玉階仙仗擁千官
花迎劔珮星初落柳拂旌旗露未乾
獨有鳳皇池上客陽春一曲和皆難

行軍詩二首

時扈從在鳳翔

吾竊悲此生四十幸未老一朝逢世亂終日不自保胡

兵奪長安宮殿生野草傷心五陵樹不見二京道我皇
在行軍兵馬日浩浩胡雛尚未滅諸將懇征討昨聞咸
陽敗殺戮淨如掃積屍若丘山流血漲澧瀉干戈礙鄉
國豺虎滿城堡村落皆無人蕭條空桑棗儒生有長策
無處豁懷抱塊然傷時人舉首哭蒼昊

早知逢世亂少小謾讀書悔不學彎弓向東射林胡偶
從諫官列謬向丹墀趨未能匡吾君虛作一丈夫撫劒
傷世路哀歌泣良圖功業今已遲攬鏡悲白鬚平生抱

忠義不敢私微軀

送許拾遺歸江寧

詔書下青瑣駟馬還吳洲
束帛仍賜衣恩波漲滄流
微祿將及親向家非遠遊
看君五斗米不謝萬戶侯
適出西掖垣如到南徐州
歸心望海日鄉夢登江樓
大江盤金陵諸山橫石頭
楓樹隱茅屋橘林繁歸舟
種藥疏故畦釣魚垂舊鉤
對月京口夕觀濤海門秋
天子憐諫官論事不可休
早來丹墀下高駕無淹留

北庭北樓呈幕中諸公

嘗讀西域傳漢家得輪臺古塞千年空陰山獨崔嵬二
庭近西海六月秋風來日暮上北樓殺氣凝不開大荒
無鳥飛但見白龍堆舊國眇天末歸心日悠哉上將新
破胡西郊絕烟埃邊城寂無事撫劒空徘徊幸得趨幕
中託身厠羣才早知安邊計未盡平生懷

唐百家詩選卷三